

Cu tambu di Yendi Koolman den papel principal:

FESTIVAL DI DANDE ORIGINAL NA SAVANETA EXITO GRANDI

ORANJESTAD(AAN): -- Riba diabierna ultimo, un evento masha special a tuma lugar.

Esta, e Festival di Dande Original combina cu Aguinaldo, organiza pa Comision Yendi Koolman.

E festival aki a wordo teni den Heilig Hart College na Savaneta, y tabata dedica na Supriano 'Shon Lang' van der Linde y Felipe 'Federico' Koolman.

Presentacion tabata den man di Persey Jeandor.

Tabata tin actuacion di gran cantidad di grupo di Dande, mientras cu tabata tin shownan tambe, entre otro di Brigitte Croes, Grupo di Baile Las Violetas y Placentero Ritmo y Cuerde.

E gruponan di Dande cu a participa tabata, Grupo di Dande di Hoben, Ismael Croes y su Grupo, Grupo Amistad, Tipico San Luis, Tipico Pegasaya, Tipico Yara, Tipico Perla, Tipico Luceros del Alma, Tipico Brazil, Tipico Strea di Yara y Eloy Koolman y su Grupo.

Tur a toca un pa dos pieza prome cu nan a canta e Dande mes, y tin cu a dal dos Dande te hasta.

E piezanan y tambe e Dandenan cu a rezona tabata excelente, caminda no por keda sin menciona Tipico Perla cu su cantantenan Carlos van der Linde y Cesar Olarte.

Prome cu el a trece su Dande, Tipico Perla a toca un wals sumamente precioso, cu un di e integrantenan di Mariachi Perla di Aruba riba violin.

Djey, Cesar Olarte a dal bay cu e Dande, cu el a canta asina bunita cu el a laga e publico plan bari, como cu tur hende tabata kier a bin dilanti pa tira placa den su sombre.

E papel principal durante e festival, tabata pa e tambu di Yendi Koolman.

Geverf blanco e dia anterior, e famoso tambu a acompaña cada grupo durante su presentacion.

No obstante su edad di 65 aña, e tambu di Yendi ta saca stem ainda, maske e tocador-

nan tabata tin cu bisti un lanterna dilanti nan paña, pa nan no susha na verf.

Durante e anochi tabata tin tambe, entregamento di plakaat na e dos personanan na kendenan e festival a keda dedica, esta, Shon Lang van der Linde y Federico Koolman.

Tambe na Cecelito Lopez di Radio Caruso Booi, un persona cu ta traha duro pa stimula e ambiente di fin di aña y pa mantene cultura y tradicion di Aruba.

Aunke e festival a bay bon, e anochi a cuminsa cu basta kibramento di cabez.

E tabata planea riba e speelplaats di Heilig Hart College, caminda e organizadornan a traha un escenario amplio pa acomoda e Dandenan y a habri gran cantidad di stul.

Net prome cu e festival tabata di cuminsa sinembargo, awacero a basha, loke a obliga e comision pa dicidi pa tene e evento paden, bao di e speelplaats tapa.

Den un rato a set up un escenario nobo, a yena e lugar cu stul y tabata cla pa ricibi e publico.

E publico a asisti bon y tabata, seguramente despues cu e Dande a drenta e curpa, masha anima.

E gruponan tabata por a conta cu hopi apoyo y aplausonan entusiasta di parti di esnan presente.

Den e publico tabata tin entre otro, ministro di Cultura señora Lily Beke, ministro di Finanzas Armand Engelbrecht y Padu del Caribe, kendenan a seguramente disfruta di e bunita festival.

Ta di spera cu e Festival di Dande Original combina cu Aguinaldo lo bira un cumber di tur aña, siendo un iniciativa valioso di parti di Comision Yendi Koolman.

Ohala cu e comision tin e forza pa organize otro aña atrobe y cu henter comunidad, particularmente esnan pariba di brug, yuda nan pa carg'e.

Riba e fotonan hunto cu e articulo, un impresion di e anochi.

